

Ex parlamentario Marisol Tromp ta aclaria acusacionnan den su direccion relaciona cu tereno di St. Regis Hotel

Ayera mainta politico y ex parlamentario Marisol Tromp a tene un conferencia di prensa durante cual el a trece dilanti informacion relaciona cu e topico di tereno di beach dilanti St. Regis Hotel. Tromp a indica cu el tuma nota cu tin informacion, eroneo segun e politico, ta circula cu ta implica su persona den e situacion aki y kier a sali pa dilanti pa aclaria duda cu tin riba su envolvimento den esaki.

Tromp a splica cu el a tene e conferencia di prensa aki pa motibo cu tin informacion cu ta bay rond cu no ta correcto y cu ta mas bien instigativo referiendo cada bes na su persona como ex minister di infraestructura. El a splica kico tabata e decision cu a tuma den e tempo di 2006, y tambe kico a sucede despues.

El a indica cu el a mira, despues di e protesta cu a tuma luga diadomingo, cu prome minister a bisa cu su persona lo a cera acuerdo cu St. Regis hotel na aña 2006 pa traha hotel na e area aki. Ademá el a indica cu tambe tabatin mas aspecto caminda mas bien gobierno ta laba man den splica e berdad.

E ex parlamentario a señala cu tambe ta ser referi cu su lo a duna tereno na hotel St. Regis, cual el a indica no ta corecto. El a splica cu loke tabatin e tempo ey, den añanan 2006, e situacion y e tempo-



rada tabata diferente compara cu awor. El a sigui splica cu tabatin un gobierno cu no tabata un coalicion y ademá e tempo ey tambe tabatin hopi peticion, como tambe necesidad pa desaroyo riba e isla, no solamente pa hotel.

Tromp a señala cu e tempo ey tur toma di decision di gobierno, particularmente di su persona como minister y sobretodo ora tabata trata proyectonan grandi, hotel, condominio, of ta trata proyectonan di hopi impacto, semper tabatin un manera di traha.

El a splica cu e manera di traha tabata cu ta e departamentonan di gobierno ta esunnan cu tabata prepara, instala comisionnan, reuni cu desaroyadornan, planifica y wak si nan ta haya loke nan ta

pidi of no. El a resalta cu muy en particular nan tabata presenta un consejo completo e tempo ey na minister di infraestructura y ora di bay tuma decision, como minister di infraestructura e tempo ey, e no tabata tum'e sin consulta cu Consejo di Minister.

“Kiermen tur e tipo di proyecto aki tambe a bay Consejo di Minister pa informa y pa haya un aprobacion p'e y como minister di Infraestructura bo ta aprob'e y carga e responsabilidad.” El a subraya.

Pa loke ta e area caminda e hotel ta situa, Tromp a splica cu antes for di prome cu aña 1954 e area ey no tabata di gobierno, e tabata eigendom, y tabata tereno entre otro, di un famia Eman y tabata propiedad di Aruba Palm Beach

Club caminda e tempo ey tabatin otro construccion eynan, cuater cas di club net na e area cu nan ta cuestionando cu lo ta di pueblo.

El a sigui splica cu despues di tempo e propietario nan a negosha y a bende esaki den transcurso di añanan y keto bay e tabata un tereno eigendom. El a indica cu na aña 2006 loke a sucede ta cu su persona como minister a haya e consejo, despues cu e peticion a drenta, pa entre otro yega na un acuerdo, cual a bay Consejo di Minister, pasobra tabatin un propiedad eigendom combina cu erfpacht hunto, y kier a desaroya timeshare aki.

E ex minister a subraya cu e tempo ey e decision pa otorga nan e parti timeshare tabata entre otro basa cu den e añanan ey tabatin hopi hende trahando den e mercado y tabatin necesidad pa e desaroyo aki y asina e peticion aki a ser honra pa e parti di timeshare. Despues a bin negociacion entre tur departamento di gobierno y a propone pa haci e tereno erfpacht, pasobra e tempo ey lo tabata un problema no solamente pa nan pero pa tur envolvi despues si el a ser otorga como tereno combina, erfpacht combina cu eigendom.

Pa evita problemanan legal a opta pa haci'e erfpacht y una bes cu esaki a tuma luga no tabatin desaroyo eynan, e luga a keda bashi, te aworaki cu tur hende sa con el desaroya.

Segun e Tromp a indica despues di esey a bin un acercamento na e ministernan di infraestructura cu a bin despu-

es di dje y na e aña 2016 bin ariba, tabatin entre otro cambio di destinacion, el a bira un hotel en bes di timeshare.

Tromp a agrega cu a bin un MoU caminda ministernan di e tempo ey na 2018, Otmar Oduber di Infraestructura y Dangui Oduber di Turismo, a yega na un acuerdo cu e compania pa aproba e masterplan cu tabatin e tempo ey y un parti di dje tabata pa percura pa e warda di polis schuif y pone area pa cierto recreacion.

“Ta un acuerdo cu nan a yega na dje y cu nan a presenta cu hopi celebracion pasobra ta trata di un hotel di prestigio y a ser considera e momento ey cu e lo ta algo positivo pa Aruba,” el a indica.

Biniendo back den actualidad y e preocupacion riba e palo di kwihi, y e flora y fauna, el a subraya cu ta un preocupacion real, pero no ta uno ta existi di awo, e ta existi di antes caba y p'esey mes for di añanan 2006 sin cu tabatin construccion eynan a bay over pa percura cu e ta proteha.

Tromp a indica cu no tabata trata e palo di kwihi so. Pues e tempo a percura pa no solamente proteha e mata di kwihi, pero tabatin otro mata e tempo ey, cu tabata uno hopi unico, cu tambe a percura pa pone den acuerdo entre DOW, DIP y Santa Rosa e tempo ey pa proteha esakinan di cualkier desaroyo cu por tin den futuro.

Hopi ta menciona cu e acceso na beach y e beach publico. E ex parlamentario a recorda cu Aruba ta un pais cu tur e lama- y beachnan mester keda semper pa pueblo. “No tin anda cu por wordo bendi, no tin nada cu por wordo kita cu loke ta lama, semper e ta di pueblo,” el a enfatisa.

Pa loke ta e parasol- y stoelnan cu e hotel tin riba e tereno aki. El a splica cu informacion cu ex minister Otmar Oduber a duna cu e hotel lo mester paga precario pa e parasolnan aki, no ta cuadra. El a sigui splica cu hotelnan, cualkier luga of persona ta paga precario ora cu ta trata di tereno publico, den e caso di e hotel, segun Tromp, ta tereno di e hotel cu tin'e den erfpacht y nan por haci esaki.

